

ՓՈԽԸՄԲՈՒՆՄԱՆ ՀՈՒՇԱԳԻՐ
ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆ
ԵՎ

«ԹԵՔՆՈԼՈԶԻ ԷՆԴ ՍԱՅՆՍ ԴԱՅՆԱՄԻՔՍ» ԸՆԿԵՐՈՒԹՅԱՆ
ՄԻՋԵՎ ՏԵՂԵԿԱՏՎԱԿԱՆ ՏԵԽՆՈԼՈԳԻԱՆԵՐԻ, ՏԵՂԵԿԱՏՎԱՅՆԱՅՄԱՆ,
ՀԵՌԱՀԱՂՈՐԴԱԿՑՈՒԹՅԱՆ ԵՎ ԻՆՈՎԱՑԻՈՆ ՈԼՈՐՏՆԵՐԻ ԽԹԱՆՄԱՆ ՄԱՍԻՆ

ՀՀ կառավարությունը (այսուհետ՝ Կառավարություն) և «ԹԵՔՆՈԼՈԶԻ ԷՆԴ ՍԱՅՆՍ ԴԱՅՆԱՄԻՔՍ» ընկերությունը (այսուհետ՝ Ընկերություն) միասին՝ Կողմեր

Նկատի ունենալով այն, որ ՀՀ Կառավարությունը հաստատական է՝ աջակցելու և խթանելու Հայաստանի Հանրապետությունում տեղեկատվական տեխնոլոգիաների, տեղեկատվայնացման, հեռահաղորդակցության և ինովացիոն ոլորտի մրցունակության զարգացմանը և մրցունակության ուղղությամբ բեկումնային առաջընթացի ապահովմանը, օտարերկրյա ներդրումների ներգրավմանը և բարձր հավելյալ արժեք ապահովող աշխատատեղերի ստեղծմանը,

Հաշվի առնելով այն, որ Հայաստանի Հանրապետությունն այսօր տարածաշրջանում առաջատար դիրք է զբաղեցնում տեղեկատվական և բարձր տեխնոլոգիաների ոլորտում, որը տնտեսության ամենաարագ զարգացող ոլորտներից է, որը մեծապես նպաստում է տնտեսության աճին, մրցունակության, արտադրողականության և երկրի գիտատեխնիկական վարկանիշի բարձրացմանը,

Նկատի ունենալով այն, որ անհրաժեշտ է պետական-մասնավոր համագործակցության սկզբունքի հիման վրա իրականացնել լայնածավալ զարգացման ծրագրեր՝ ուղղված ժամանակակից տեխնոլոգիական ենթակառուցվածքների ստեղծմանը, ֆինանսական գործիքների ներդրմանը, ձեռներեցության խթանմանը, կարողությունների զարգացմանը և արտադրողականության բարձրացմանը, տեխնոլոգիական մասնագետների պատրաստմանը և օտարերկրյա ուղղակի ներդրումների խթանմանը,

Ելնելով այն հանգամանքից, որ անհրաժեշտ է օգտագործել և ներգրավել սփյուռքի մարդկային և կառուցվածքային ռեսուրսները, առկա ներուժը Հայաստանի կողմից միջազգային հարթակներին առավել արդյունավետ ինտեգրվելու ճանապարհին, ինչպես նաև ներդրումների խթանման, անդրազգային ընկերությունների ներգրավման և մարդկային ռեսուրսների զարգացման գործում,

Հաշվի առնելով այն, որ Ընկերությունը հանդիսանում է ոլորտի առաջատար ընկերություն և առաջարկում է ստեղծել ներկայացուցչություններ թիրախային

շուկաներում, որպես ներառական համագործակցության հարթակ, պետական և մասնավոր հատվածի գործընկերության միջոցով Հայաստանի SCS ոլորտի զարգացման և խթանման համար,

Ելնելով այն հանգամանքից, որ Կողմերն ընդունում են պետական և մասնավոր հատվածի գործընկերության միջոցով ներառական համագործակցության և զարգացման նոր հարթակների ստեղծման տեսլականը և անհրաժեշտությունը SCS ոլորտի զարգացման համար,

Կողմերը համաձայնեցին կնքել սույն Փոխըմբռնման Հուշագիրը (այսուհետ՝ Հուշագիր) հետևյալի մասին.

Հոդված 1. Նպատակը

- 1.1 Կողմերը պայմանավորվում են ստեղծել ներկայացուցչական գրասենյակներ՝ թիրախային շուկաներում SCS ոլորտում գործարար կապերի խթանման, երկրի վարկանիշի և մրցունակության բարձրացման, ներդրումների ներգրավման, արտահանման կարողությունների և ինովացիոն ենթակառուցվածքների զարգացման համար:
- 1.2 Նպաստել թիրախային շուկաներում երկրի, տնտեսության և SCS ոլորտի ներդրումային վարկանիշի բարձրացմանը, SCS ոլորտի արդյունքների վերաբերյալ իրազեկվածության բարձր մակարդակի ապահովմանը.
- 1.3 Նպաստել տեղական կազմակերպությունների և օտարերկրյա ներդրողների միջև գործընկերության հաստատմանը և խթանմանը.
- 1.4 Ձևավորել հնարավոր օտարերկրյա ներդրողների և մասնագիտական կազմակերպությունների տեղեկատվական բազա,
- 1.5 Դյուրացնել հայկական և օտարերկրյա ընկերությունների և մասնագետների միջև կապի ստեղծումը, փորձի ուսումնասիրումն ու կիրառումը, ինչպես նաև փորձի փոխանակումը.

Հոդված 2. Համագործակցության հիմնական ուղղությունները

Կողմերը համաձայնվում են համագործակցել և միավորել իրենց ջանքերը գործունեության հետևյալ ուղղություններում.

- 2.1 Իրականացնել քարոզարշավներ՝ օտարերկրյա ներդրումներ ներգրավելու նպատակով և խթանել հայկական SCS ոլորտի ներդրումային հնարավորությունները.
- 2.2 Կազմակերպել ցուցահանդեսներ, տոնավաճառներ, համաժողովներ (ֆորումներ), սեմինարներ և այլ համանման միջոցառումներ և աջակցել SCS ոլորտի կազմակերպություններին և/կամ ձեռնարկատերերին մասնակցությանը.

- 2.3 Մշակել և իրականացնել Հայաստանի՝ որպես SCS առաջատար երկրի և հայկական SCS արդյունքի ներկայացման և խթանման, նորարարական և տեխնոլոգիական զարգացման ծրագրեր.
- 2.4 Տրամադրել օտարերկրյա ներդրողներին «մեկ կանգառի կենտրոն» սկզբունքով Հայաստանի SCS ոլորտում ներդրումային և գործարար միջավայրի, առավելությունների և հնարավորությունների վերաբերյալ անհրաժեշտ տեղեկատվություն, ինչպես նաև ներդրումների իրավական, կառուցվածքային և կազմակերպական պայմանների իրավա-տեղեկատվական աջակցություն.
- 2.5 Բացահայտել SCS ոլորտի կազմակերպությունների արտահանման ներուժը՝ նրանց արտադրանքն ու ծառայությունները գովազդելու և խթանելու նպատակով և քննարկել դրանց զարգացմանն ու արտահանմանն ուղղված գործունեության աջակցման հնարավորությունները.
- 2.6 Աջակցել արտահանման ներուժ ունեցող կազմակերպություններին բացահայտելու թիրախային շուկաները, տրամադրել թիրախային շուկաների և կազմակերպությունների մասին անհրաժեշտ տեղեկատվություն և խորհրդատվություն.
- 2.7 Նպաստել մասնագետների պատրաստման և վերապատրաստմանը, ծրագրերի մշակմանը, կազմակերպմանը և իրականացմանը.
- 2.8 Խորհրդակցել ծրագրերի պլանավորման, մշակման, ներդրման, իրականացման և մոնիթորինգի վերաբերյալ:

Հոդված 3. Փոխըմբռնման հուշագրի իրականացումը

Կողմերը համաձայնվում են հետևյալ հիմնական պայմանների վերաբերյալ՝

- 3.1 Վերոնշյալ հիմնական ուղղություններով պայմանավորված գործողությունների իրականացման նպատակով Ընկերությունը պարտավորվում է իրականացնել ներկայացուցչական գրասենյակների աշխատակիցների աշխատավարձի, վերապատրաստման, տեխնիկական հագեցվածության և այլ ընթացիկ ծախսերը ամբողջ ծավալով:
- 3.2 «Ներկայացուցչական գրասենյակների աշխատանքը առավել արդյունավետ կազմակերպելու նպատակով, ՀՀ կառավարությունը, հնարավորության սահմաններում, անհատույց տրամադրում է գրասենյակային տարածք (առկայության դեպքում) օտարերկրյա պետություններում ՀՀ դեսպանատներում և հյուպատոսական հիմնարկներում: Դա հնարավորություն է ընձեռում ներկայացուցիչների համար ապահովել անհրաժեշտ աշխատանքային տարածք և հասցե»:
- 3.3 Առանձին ծրագրերի իրականացման մասով Կողմերը կարող են կնքել համաֆինանսավորման կամ դրամաշնորհային համաձայնագրեր, որոնք կհստակեցնեն գործողություններին առնչվող ծախսերը և դրանց ֆինանսավորման մեխանիզմները:

3.4 Կողմերը պայմանավորվում են նաև, որ Հուշագրի ներքո առաջարկվող համագործակցությունը՝ սույն Հուշագրի նպատակների և համագործակցության ուղղությունների մասով, բացառիկ է:

Հոդված 4. Խորհրդակցում և տեղեկատվության փոխանակում

4.1 Կողմերը համաձայնվում են պարբերաբար միմյանց տեղեկացնել և խորհրդակցել ընդհանուր հետաքրքրություն ներկայացնող այնպիսի հարցերի շուրջ, որոնք Կողմերի կարծիքով կարևոր են ծրագրի արդյունավետ իրականացման համար:

4.2 Կողմերը համաձայնվում են, որ որոշակի դեպքերում խորհրդակցումը, տեղեկատվության ու փաստաթղթերի փոխանակումը կարող են լինել գաղտնի և/կամ կրեն սահմանափակ հասանելիության բնույթ: Նման դեպքերում կողմերը համաձայնվում են իրականացնել խորհրդակցումը, տեղեկատվության ու փաստաթղթերի փոխանակումը այնպիսի ձևաչափում, որը կապահովի այդ տեղեկատվության և փաստաթղթերի գաղտնիությունը և սահմանափակ հասանելիությունը:

4.3 Կողմերը համաձայնվում են սահմանված պարբերականությամբ անցկացնել հանդիպումներ և/կամ քննարկումներ՝ վերանայելու սույն Հուշագրի ներքո իրականացվող գործողությունների կատարման ընթացքը և ծրագրավորելու/պլանավորելու ապագա գործողությունները:

4.4 Ընկերությունը պարտավորվում է մինչև յուրաքանչյուր եռամսյակին հաջորդող ամսվա 20-ը Կառավարությանը ներկայացնի կատարված աշխատանքների և ձեռք բերված կամ ակնկալվելիք արդյունքների վերաբերյալ հաշվետվություն:

Հոդված 5. Տևողությունը, դադարեցումը և փոփոխումը

5.1 Սույն Հուշագիրը գործում է հինգ տարի ժամկետով:

5.2 Սույն Հուշագիրը կարող է փոփոխվել միայն Կողմերի փոխադարձ գրավոր համաձայնությամբ:

5.3 Փոխըմբռնման Հուշագիրը կարող է դադարեցվել Կողմերից որևէ մեկի առաջարկությամբ՝ երկու ամիս առաջ այդ մասին գրավոր տեղեկացնելով մյուս կողմին:

5.4 Փոխըմբռնման Հուշագրի ժամկետը լրանալուց հետո Կողմերը կարող են գրավոր համաձայնության գալ՝ այն երկարաձգելու վերաբերյալ:

5.5 Փոխըմբռնման Հուշագրի գործողության դադարեցման դեպքում դրա ներքո կնքված համաֆինանսավորման կամ ծրագրի շրջանակներում համագործակցության ցանկացած համաձայնագրեր և ցանկացած ծրագրային փաստաթղթեր նույնպես կարող են լուծվել՝ նման համաձայնագրերում պարունակվող լուծման մասին դրույթների համապատասխան: Այդ դեպքում Կողմերը պարտավոր են ձեռնարկել անհրաժեշտ քայլեր՝ ապահովելու, որպեսզի սույն Հուշագրով նախատեսված համաֆինանսավորման, դրամաշնորհային

համաձայնագրերի և ծրագրային փաստաթղթերի ներքո իրականացվող գործողությունները հասցվեն պատշաճ և կանոնավոր ավարտի:

Հոդված 6. Ուժի մեջ մտնելը

6.1 Սույն Հուշագիրը ուժի մեջ է մտնում ստորագրման պահից:

Հոդված 7. Այլ հարցեր

7.1 Կատարված է քաղաք Երևանում ս.թ. -----երկու բնօրինակից, յուրաքանչյուրը հայերեն լեզվով:

7.2 Սույն Հուշագիրը չի հանդիսանում իրավական առումով պարտավորեցնող կամ որևէ իրավունքի համաձայն չի սահմանում իրավական պարտավորություններ:

ՀՀ կառավարության անունից՝

**«ԹԵՔՆՈԼՈՋԻ ԷՆԴ ՍԱՅՆՍ ԴԱՅՆԱՄԻՔՍ»
ընկերության անունից՝**
